

**2020-mit aallartittumik 2020-mut aningaasanut inatsit aqqutigalugu ukiuni sisamani misiligutaasumik ukiumut 4 mio. kr-it angullugit salliutitsilluni, ulloq 1. januar 2020 aallarnerfigalugu meeqqanut inuusuttunullu sumiginnagaasunut ornigullutik pinaveersaartitsinermik suliaqartussanik "Unnuarissatut" taagorneqartunik isumassuisartunik illoqarfinni Nuummi, Tasiilami, Sisimiuni, Aasianni Qaortumilu sisamangornermit nal. unnukkut arfineq pingasuniit sapaammi ullaakkut arfineq pingasut tungaannut aqqusinerni angalaartartussanik pilersitsinissaq pillugu Naalackersuisut pisussaaffilerneqarnissaannut Inatsisartuni aalajangiiffigisassatut siunnersuut.**

(Inatsisartunut ilaasortaq Peter Olsen, Inuit Ataqatigiit)

### **Akissuteqaat**

Isumaginninnermut Inatsisinillu Atuutsitsinermut Naalackersuisoq  
**Siullermeerneqarnera**

Misiligutaasumik ornigullutik isumassuisartunik pilersitsisoqarnissaa pillugu siunnersuummut Naalackersuisut qujapput.

Naalackersuisut siunnersuuteqartumut isumaqataapput, tassalu qanoq iliorluta meeqqanut inuusuttunullu suliaqarfimmi pitsaaliuiffiusumik suliniuteqarneq sumiginnaanerillu nukittorsaaffigissanerivut siunnersuutigineqarmat.

Naalackersuisut meeqqanut inuusuttunullu suliaqarfimmi anguniagaqarfiusumik taakkunungalu sammitamik sulissuteqarput. Suliaqarfimmi oqartussaasoqarfiit assigiinngitsunik suliallit akornanni pitsaanagerusumik sunniuteqarnerusumillu suleqatigiinnerup qulakkeerneqarsinnaaneramik Naalackersuisut annertuumik ukkataqarput. Taamaalillunilu ilaatigut Peqqissutsimut Aqutsisoqarfiup, Ilinniartitaanermut Aqutsisoqarfiup aamma Isumaginninnermut Aqutsisoqarfiup akornanni oqartussaasoqarfiit assigiinngitsunik suliallit akornanni suleqatigiinneq kiisalu pitsaaliuineramik suliaqarnerup nukittorsarnissaa pillugit suleqatigiinnermik aallartitsisimapput.

Naalackersuisut aamma ilaqutariinnut sammisunik ukkatarinninnerup nukittorsarneqarnissaanik kissaateqarput, ilaqutariinnullu politikissamik saqqummiinarlutik pilersaaruteqarlutik. Tamanna tunngavigalugu meeqqanut inuusuttunullu suliaqarfimmi suliniutini meeraq taassumalu ilaqutai aallaavigineqartarnissaat qulakkeerneqassaaq. Suliniutit taamaalillutik ilaqutariinnut tamakkiisumik sammitinneqassapput, meeqqallu attaveqarfigisartagai tamakkerlugit ilanngunneqassapput, aaqqiissutaasunullu ilanngunneqarnissaat eqqarsartigineqassalluni.

Naalackersuisut isumaginninnermut suliaqarfimmi sulisut akornanni ilinniartoqarnissaa piginnaasanillu kivitsisoqarnissaa aamma annertuumik ukkataraat. Tamannalu pissutaalluni suliaqarfimmi ilinniartitaanerit pioreersut patajaallisarnissaannut nutaanillu pilersitsinissamut aningaasanik immikkoortitsisoqarsimavoq.

Taamaammallu meeqqat sumiginnarneqartartut ikilisinnissaannik kissaateqarutta meeraaqqerivinni, ulluunerani paaqqinnittarfinni, meeqqat atuarfiini, peqqinnissaqarfimmi il.il. inuussutissarsiutigalugu sulisut meeqqatsinnik naapitsisartut pisariaqartunik ilisimasaqarnissaat pisariaqartunillu atortoqarnissaat qulakkiissallugu pingaaruteqartorujussuuvog, tamakkumi iluaqutigalugit makkuninnga piginnaasaqalissammata: Atugarliortunik nassaarinnineq, sumiginnaasunik pasitsaassisoqartillugu iliuuseqarsinnaaneq, meeqqap ilaqutaanik attaveqarfisartagaanillu ilanngutitsineq kiisalu meeqqamut ilaqutariinnullu tunngatillugu suliniuteqartoqartillugu oqartussaasunik allanik suleqateqarneq.

Soorlu siunnersuuteqartup uparuaraa meeqqanik inuussuttunillu isumaginnineq kommunit akisussaaffigivaat.

Naalackersuisut akisussaaffimmik pisinnaatitaanermillu agguaassisarneq pillugu inatsisini aalajangersakkat tulluurtuusut isumaqarput. Meeqqanut unnukkut unnuaanerani aneertartunut tunngatillugu unammilligassat najukkani qanittunilu aaqqiissutissat aqutigalugit iluarsineqarpata iluarnerpaajuvoq. Naalackersuisut isumaqarput suliniutigineqartut najukkani unammilligassanik tigussaasunik aallaaveqartinneqarpata, najukkanilu suliarineqarpata sunniuteqarnerpaajunissaat ilimanarnerpaajussasoq. Assersuutigalugu suliniut nutaaq aallartitsinnagu kommunit ataasiakkaat sulisussarsiortarnermut qanoq periarfissaqartiginersut eqqarsaatigisariaqarpoq.

Inunnik isumaginninnermi sulisunik sulisussarsiortarneq sulisullu suliffinnik attasiinnartinnissaat ajornartuusinnaasoq kommunit amerlanerit ilisimareerpaat. Taamatut unammilligassaqarneq suliniutinik nutaanik aallartitsiniarnermi aamma naammattuugassaassaaq.

Isumaginninnermut Aqutsisoqarfiup ilaatigut meeqqanut inuussuttunullu suliassaqarfimmi kommunit suliassaat tapersersuiffigissallugit suliassaraa. Kommunillu meeqqanik unnukkut kisimiillutik aneertunut unammillernartunik misigisallit assersuutigalugu najukkani aaqqiissutaasinnaasunut tunngatillugu siunnersuisoqarnissaa suleqatigiittoqarnissaalu siunertaralugit Isumaginninnermut Aqutsisoqarfimmut saaffiginninnissaminut assut tikilluaqqusaapput.

Naggasiutigalugu "Unnuarissat" innersuussutigineqartut nammineq piumassuseq tunngavigalugu suliniutaamat tulluurtuuvoq ilanngutissallugu. Naalackersuisut nunatsinni peqatigiiffiit nammineq piumassuseq tunngavigalugu ingerlanneqartut aqutigalugit sulinnermut ataqqinnittorujussuupput, isumaqarlutilli nammineq piumassuseq tunngavigalugu sulineq akissarsiaqartitsineq aqutigalugu tapersersussallugu imaluunniit sulinerannik pisortat inangiinissaat tulluurtuunngitsoq.

Taamatut oqaaseqarlunga siunnersuut itigartinneqassasoq Naalackersuisut inassutigaat.